

Bilbon epaitutako 7 gazteek ukatu egin dute kale istiluetan parte hartu zutela


Urrutikoetxea kanporatu osteko enfrontamenduetan aritu izana egotzi die fiskalak

Kale istiluetan parte hartu izanaz eta Ertzaintzaren aurkako atentatuaz akusatuta dauden zazpi gazteek, fiskalaren eta abokatuen galderei erantzutean, ukatu egin zuten maiatzaren 4ko goizean izandako enfrontamendu eta istiluetan parte hartu zutela. Bizkaiko Ertzaintzaren lekukoen deklarazioak aditzen hasiko da gaur.

Iñaki Uriarte / Bilbo

MAIATZAREN 4an Bilbo Zaharrean atxilotutako zazpi gazteek ukatu egin zituzten fiskalaren akusazioak. Honek behin-behineko kalifikazioan frogatutzat eman zuen zazpi gazte hauek aurpegiak estalita zeramatatzatela Postetxeko furgoneta bat eta autobus bat erre eta Ertzaintzari oldartu zitzaizkiola. Protesta eta enfrontamenduak Josu Urrutikoetxea Espainiaratu zuten egunean gertatu ziren. Egun horretan ertzain bat eta kalean zebilen beste pertsona bat arin zauritu ziren.

17 urteko hiru mutilen eta 18ko beste lauren deklarazioak ordu eta erdi iraun zuen. Lehena deklaratu A.E. 17 urteko bilbotarra izan zen. Fiskalaren galderei erantzunez gazteak esan zuen pilota partidu bat ikusten egon zela Esperantzako frontoian. Bertsio honen arabera, handik irten zenean pilotakadak entzun eta korrika zihoazen beste pertsona batzuen multzoan sartu zen handik aldegiteko asmoz.



Hiru akusatuk 17 urte dituzte, gainontzeko laurak 18.

SIMAL

Kale erdian atxilotu zuen Ertzaintzak.

J.C.G.k ere ukatu egin zuen istiluetan parte hartu zuela. Gazte honek ukatu egin zuen zapi urdinik edo alikaterik zaramala atxilotu zutenean. Tabernari lagun batekin egon eta gero Uribarri auzoan bazkaltzera zihoala adierazi zuen.

Adin txikiko U.A. mutilak, Etxebarria parkean Harriet Irargirekin futbol partidu bat jolasten egon zela azaldu zuen. Begoñako igogailutik jaitsi eta jente olde bat korrika zetorrela ikusita beraiek ere korrika hasi zirela adierazi zuten U.A.k eta Iragak. Esperantza kalean dagoen ikastetxe batera sartu zirela esan zuen. Irten zirenean atilotu zituzten. Bi gazteak ukatu egin

zuten mozorrorik edo altzairuzko bolak zeramatatzatela. Lau gazteak Arantza Zulueta eta Jone Goirizelaia izan zituzten letratu.

Gainontzeko hiru mutilek, Edorta Ibarzabal, Iñaki Tejedor eta Ander Arrietak, San Nicolas eliza ondoko taberna batean zerbait edaten egon ostean kalera irten eta oihiu eta lasterketak entzun zituztela adierazi zuten. Arantza Zulueta, Ibon Gaiza eta Iñaki Esnaola letratuak izan arren, antzeko deklarazioa egin zuten. Gazteek esandakoaren arabera, metro batzuk lasterka egin eta gero Zabalburu ikastetxean sartu ziren. Segurtasun zaindariak bertan egoterik ez zutela esan eta kanpora bidali zituen. Handik gutxira ikastetxeko atean atxilotu zituzten.

Hasieran zazpi gazteak Martutenen kartzelaratuta bazituzten ere, egun behin-behineko askatasunean daude guztiak.

Gaur lekukoen txanda • Goizeko hamarretarako aurreikusita dagoen bigarren salo honetan lekukoen txanda izango da. Fiskalak hamar ertzainen eta beste hiru pertsonaren lekukotasuna proposatu zuen, beraien artean San Anton elizako inguruetan zauritu zen gizonarena.

Defendatzaileek, gazteekin goiz horretan egon eta horiekin zerkusia izan dezaketen beste pertsona batzuen lekukotasuna proposatu dute. Fiskalak 43 urteko kartzelaldia metatzen duen zigorra eskatzen du eta abokatuek, berriaz, guztiak absolbitzeko. X

Errenteriako gazteen aldeko manifestaldi jendetsua

Hiru mila pertsona inguru bildu ziren igandean hiru gazteen errugabetasuna aldarrikatzeko

Nagore Irastorza / Donostia

UNAI ERKIS, Jon Ander Gonzalez eta Aitor Garcia gazteen askatasuna eskatu zuten 3.000 pertsona inguruk igandean Errenteriako kaleetan zehar eginiko manifestaldi isilean.

Errenteriako Zumarditik abiatu zen manifestaldia arratsaldeko 19:30etan, Askatasunaren Alde eta Muntia Polizialaren Kontrako Plataformak antolatuta. Hiru gazteen argazkiak zaramatzaten senide eta lagunek zabaldu zuten manifestaldia, eta atzetik Unai, Jon Ander eta Aitor errugabeak leloa zuten pankartekin zihoan jendea. Manifestaldia isila eta legalizatua zen, eta normaltasunez amaitu zen hasitako leku berean. Ibilbidean zehar Ertzaintzaren hainbat furgonetak manifestaldia gertutik jarraitu arren, ez zen istilurik sortu.

Zumardian, gazteei zuzenduriko kantu baten ostean, plataformako kide batek hitzaldi laburra egin zuen. Epaitegiak ezarritako epaia «legez kontrakoa eta guztiz onartezina» dela aitortu zuen, eta epaiaren inguruan alderdi politiko eta komunikabideek izandako jarrera salatu zuen: «Hasieratik errudunak balira bezala agertu zituzten, eta orain, epaiaren ondoren, zigor gogorragoa ezarri nahi diete». Hiru gazteen askatasuna lortu arte eta errugabetasuna frogatu arte plataformak bere aldarrikapenak eginez jarraituko duela adierazi zuen aipatu kideak.

«Manifestaldi honen helburua jendea kontzientziatzea zen, komunikabideek eta Ertzaintzak erasoaren egile gisa aurkeztzen baitituzte gazteak», adierazi du plataformako kide batek.

Unai Erkis, Jon Ander Gonza-



Plataformak kontzentrazio ugari egin zituen Donostiako Auzitegiaren aurrean epaieketa egin zen artean, argazkian horietako bat.

ANDER GILLENEA

lez eta Aitor Garcia gazteei seina urteko kartzela zigorra ezarri zien Donostiako epaitegiak, iaz Ertzaintzaren furgoneta bati erasotzeaz akusatuta. Plataformak

gazteen errugabetasuna aldarrikatu du bere ekintzetan, eta hiru gazteen askatasuna lortu arte haien aldeko ekintzekin jarraitzeko asmoa azaldu du. X

Bi ertzainen autoei eraso diete Basaurin eta Azkoitian

■ Horietako bat Ander Susaetarena da, eta ez zuen kalte handirik izan

Erredakzioa / Donostia

LARUNBAT gauean ezezagun batzuk Ander Susaetaren autoa —1993. urtean Bilboko festetan jipoitu zuten ertzaina— erretzen saiatu ziren. Horretarako, bi molotov koktel jaurti zituzten, baina batek ez zuen su hartu. Eztanda egin zuen koktelak ere ez zuen Citroen markako autoan kalte handirik eragin, segituan itzaltzea lortu baitzuten.

Egin egunkarira eginiko dei batean ezezagun batek bere gain hartu zuen eraso, «lehen bere etxeari eraso genion, orain bere autoari, eta hurrengoan bere bila joango gara», esan zuen. Izan ere, duela bi hilabete-edo Ander Susaetaren amaren etxeko ateari su eman zioten.

Bestalde, Azkoitian ertzain baten autoa gasolinaz busti zuten eta ondoren su eman zioten. Ertzaina bere autoa sutan zela ohartu zen eta suhiltzaileei deitu zien.

Ford Scorpio autoak aurrealdean baino ez zuen kalterik izan. Eraso «euskal preso politikoan alde» egin zutela adierazi zuten dei anonimo baten bidez.

Azkenik, beste ezezagun batek Gasteizko Bar 70 tabernari eraso ziotela azaldu zuen, eta eraso jabea ertzain delako egin zutela esan zuen. X

Donostian eta Gasteizen bi auto frantses erre dituzte

Erredakzioa / Donostia

BURUA estalita zuten zerbait gazte, larunbat goizaldean, Frantziako matrikula zuen auto bat erre zuten Gasteizen. Salaketa autoaren jabeak berak jarri zuen. Ertzaintzak jakinarazi zuenez, burua estalita zuten gazteek molotov koktelak jaurti zituzten autoaren aurka. Suhiltzaileek ezin izan zuten gauza handirik egin, eta autoa suntsituta geratu zen. Ertzaintzak eraso larunbatean Gasteizen bertan izan ziren istiluen barruan kokatu zuen.

Donostian ere larunbatean burua estalita zuten zerbait gazte Parte Zaharreko Aldamar eta Soraluze kaleen artean zegoen Renault 21 markako autoa erre zuten, honek ere Frantziako matrikula zuen. X